

դըուխը հորեղանին բաղխում : Մի քանի շինահաններ են անցնում : Փափախ, պատուաժ ըզգեսաներ, գրեթէ ցնցոտիներ, չարութիւններ : Այրուած ու մաշուած դէմքեր, որոնք ոչինչ չեն արտայայտում : Ժայռերի նման լուռ են եւ մունջ : Գնում են ծանրաբայլ, իրենց ձեռքին մի փայտ բռնած, առանց հետաքրքրութեան՝ ոչ մի բանից չզարմանալով :

Ի՞նչ թաղցնեմ, ես նրանց չեմ հասկանում :

Եւ որովհետեւ չեմ հասկանում՝ մեղամաղձութիւնս դեռ աւելի սաստկանում է : Պիտի ուղէի կառքից, իշխանութեան խարխուլ եւ ծիծաղելի այս բարձրութիւնից իջնել, մօտենալ այդ շինականներից մէկին եւ միւսին, եւ կողմիտ նրանց ձեռքերը սեղմելով, ասել, որ սիրում եմ նրանց : Սիրո՞ւմ եմ նրանց : Աւելի շուտ սղէք եմ զգում սիրելու, անհրաժեշտ է որ սիրեմ, ոչ թէ իրենց խորամանկութեան համար, իրենց կծու եւ սահմանափակ ժլատութեան համար, այլ նրա համար, որ նրանք հիմնական մասն են կազմում դարաւոր մի ամբողջի ողբերգական մի պատմութեան եւ իմ սրտիս մէջ բազմոց հողեկան մի աշխարհի :

Եւ նաեւ, որովհետեւ նրանցից ոչխարի եւ կովի հոտ է զալիս :

* * *

Արե՛ւ, արե՛ւ :

Նստել եմ նախ կամուրջի վրայ, եւ դարունը իր արեւի ճառագայթները քերել խառնել է ներսս վառուող մեղմ տենդին :

Կարծես բոցերից եփուած հին մի գինի եմ խմել :

Հեռում, դէպի հիւսիս, լիճի ավեր բուրբում է ամայի եւ մենակեաց հողերի շուրջը : Այնտեղից իջնում են Սիւնեաց աշխարհը՝ լեռների եւ անտառների վիթխարի երկիրը :

Մօտակայ ավին մի գիւղ, որի անունը չեմ յիշում : Անտառ քարերից շինուած մի քանի տներ եւ գրեթէ ոչ մի ծառ : Այի մօտ երեք կովեր են կանգնել, ահա կէս ժամ է գրեթէ անշարժ : Նրանք եւս ինձ նման արեւի պաշար են ամբարում եւ, ո՞վ գիտէ, նրանք եւս հիւանդ են որեւէ տենդով :

Տխուր է :

Դաշտանկարը ներս է մտել սրտիս մէջ եւ

տրամօրէն խօսակցում է : Սօսում է վշտալի լրարերի նման կիսաձայն, կուրծքի խորքում ընտրած մութ դեղին խօսքերով : Իր ձայնը էութեանս մէջ արձագանգում է ինչպէս խիտ մի անտառում :

— Մա՛յր իմ, եկել եմ :

— Գնացիր, աշխարհը պտտեցիր, եկար...

— Գնացի, աշխարհը պտտեցի, եկայ...

Եկայ, աւելի որը քան երբեք : Ուրախ չէ՛ աշխարհը : Գիտես, անցորդ տարադիրը ամէն տեղ էլ դժբախտ է : Այնտեղ, քաղաքները դըրբղալից են եւ ամենի, ճամբաները ոլոր են ու դժուարին եւ պատառ հացը արիւնով է խոռնուած :

Գնացի աշխարհը պտտեցի, եկայ... Ծերացե՛լ ես, մայր : Պառաւ աչքերիդ մէջ հովերը երկարօրէն հատաչել են, ու ձմեռը դողահար պար է եկել : Մագերդ ձերմկել են եւ դէմքիդ վրայ անձրեւները ակօսներ են բաց արել : Ծերացե՛լ ես, մայր :

Կովերը, միշտ նոյն դիրքի մէջ, անշարժ կեցել են :

Գարունն էլ եկել իր խօսքն է ասում :

Ասում է. սպասիր, հազար դանակներ եմ բերել, կարմիր կօշիկներ եմ հագել, դանակները պիտի սրեմ, կարմիր կօշիկներով պիտի պարեմ :

Պիտի պարեմ, պիտի պարեմ, պիտի պարեմ...

Ու աչքերիս առջեւ կոլոր լոյսեր են անցնում, ճերմակ աստղերի նման, պտոյտ են դալիս, հեռանում են, յետոյ նորից մօտենում, մեծանում, մեծանում...

Լիճն էլ խաղաղ է եւ խոր :

Խաղաղ եւ կապոյտ :

Էութեանս մի ինչ որ հեռաւոր կենտրոնում լարաւոր գործիքներ տրամօրէն նուազում են, բայց այդ տրամութիւնը անուշ է եւ հաճելի : Մերթ ընդ մերթ, սրինդի մի ձայն լեռան վրայից մեղամաղձօրէն կանչում է եւ կանանչներով ճիւղաւորուած մի աշխարհ կամաց կամաց տատանում է :

— Մա՛յր իմ, եկել եմ :

— Գնացիր, աշխարհը պտտեցիր, եկար...